

Službeni glasnik BiH, broj 52/14

Na osnovu člana 12. Zakona o Vanjskotrgovinskoj komori Bosne i Hercegovine ("Službeni glasnik BiH", broj 30/01 i 72/13), Skupština Vanjskotrgovinske komore Bosne i Hercegovine, na sjednici održanoj 8.5.2014. godine, utvrdila je prečišćen tekst Statuta Vanjskotrgovinske komore Bosne i Hercegovine, koji obuhvata: Statut Vanjskotrgovinske komore Bosne i Hercegovine ("Službeni glasnik BiH", broj 18/02) i Odluke o izmjenama i dopunama Statuta Vanjskotrgovinske komore Bosne i Hercegovine ("Službeni glasnik BiH", broj 86/10, 15/13 i 45/14), tako da isti glasi

STATUT

VANJSKOTRGOVINSKE KOMORE BOSNE I HERCEGOVINE (PREČIŠĆEN TEKST)

I - OPĆE ODREDBE

Član 1.

Vanjskotrgovinska komora Bosne i Hercegovine (u daljnjem tekstu: Komora) je samostalna, nevladina, nepolitička i neprofitna javno-pravna asocijacija privrednih subjekata i privrednih asocijacija (članova) sa teritorije Bosne i Hercegovine, sa funkcijama usmjerenim na razvoj i unapređenje ekonomskih odnosa bosanskohercegovačke privrede sa inostranstvom, uključujući i partnerski odnos i zastupanje interesa članova kod nadležnih tijela Bosne i Hercegovine i odgovarajućih asocijacija u inostranstvu.

Komora ima svojstvo pravnog lica sa pravima, obavezama i odgovornostima utvrđenim zakonom i ovim Statutom.

Član 2.

Naziv Komore je "Vanjskotrgovinska komora Bosne i Hercegovine", odnosno "Spoljnotrgovinska komora Bosne i Hercegovine".

Naziv Komore na engleskom jeziku glasi: "Foreign Trade Chamber of Bosnia and Herzegovina".

Sjedište Komore je u Sarajevu, ulica Branislava Đurđeva broj 10.

Član 3.

Komora ima znak (logotip) čiji izgled svojom odlukom utvrđuje Upravni odbor Komore.

Član 4.

Komora ima pečat, okruglog oblika, na kojem je u koncentričnim krugovima, na jezicima i pismima Bosne i Hercegovine, upisan naziv Komore i njeno sjedište.

Komora ima pečat, okruglog oblika, na kojem je na engleskom jeziku upisan naziv Komore.

Komora može, po potrebi, imati pečate i na drugim stranim jezicima.

Upravni odbor svojom odlukom može utvrditi da pečat, odnosno pečati Komore imaju znak (logotip) Komore.

Član 5.

Komorom upravljaju članovi preko svojih predstavnika u tijelima Komore.

Član 6.

Članovi Komore su preduzeća, banke, osiguravajuća društva i druga pravno-privredna lica registrirana za obavljanje poslova sa inostranstvom na prostoru Bosne i Hercegovine, automatski na osnovu članstva u privrednim komorama konstituiranim na osnovu zakona Federacije Bosne i Hercegovine, Republike Srpske i Brčko distrikta BiH.

Članovi Komore su Privredna komora Federacije Bosne i Hercegovine, Privredna komora Republike Srpske (u dalnjem tekstu: privredne komore entiteta) i Privredna komora Brčko distrikta BiH, kao kolektivni članovi.

Privredne komore organizirane na teritorijalnom i strukovnom principu, specijalizirane i slične asocijacije, članovi su Komore pod uvjetom da nadležno tijelo upravljanja donese odluku o članstvu u Komori kojom prihvata prava i obaveze kolektivnog člana Komore.

Članovi Komore mogu biti naučno-istraživačke i obrazovne institucije, udruženja građana koja u svojoj registraciji imaju privredne djelatnosti, savezi, interesne asocijacije, fondacije, zaklade i druge organizacije koje obavljaju djelatnost od značaja za privredu, kao pojedinačni ili kolektivni članovi, ukoliko svojom odlukom izraze interes za članstvo.

U slučajevima iz st. 3. i 4. ovog člana odluku o prijemu u članstvo Komore donosi Upravni odbor.

Član 7.

Nadležnosti Komore su:

- a) Članstvo i zastupanje interesa privrede (članova) u međunarodnim komorskim i strukovnim asocijacijama, odnosno organizacijama (ICC, Eurokomora, EAN, FIATA, IRU),
- b) Predstavljanje interesa članova Komore u inostranstvu, direktno, putem vlastite predstavničke mreže ili putem diplomatske i konzularne mreže - preko ovlaštenih predstavnika Komore,
- c) Obavljanje poslova javnih i stručnih ovlasti utvrđenih posebnim propisima, aktima i odlukama nadležnih državnih tijela,
- d) Saradnja i koordinacija saradnje privrednih komora i asocijacija u zemlji, posebno sa privrednim komorama entiteta i Privrednom komorom Brčko distrikta BiH, u pravcu ujednačavanja ekonomskog položaja članova Komore te pripreme i realizacije projekata od zajedničkog interesa za vanjskotrgovinsko poslovanje,
- e) Promocija i koordinacija programa edukacije i obrazovanja od interesa za članove Komore,
- f) Razvoj poslovnog i informacionog sistema sa međunarodnim bazama podataka (Međunarodna komorska mreža, C.E.I., Internet i dr.), uključujući i mrežu ponude i tražnje, te harmonizacija informacione komorske mreže u Bosni i Hercegovini,
- g) Da, u partnerskom odnosu sa nadležnim državnim tijelima, utječe na kreiranje ekonomskog sistema,
- h) Promocija i koordinacija izrade ekonomskih podataka i tržišnih analiza iz oblasti ekonomskih odnosa sa inostranstvom (izrada periodičnih analiza o tržišnim kretanjima, praćenje relevantnih podataka, samostalno i u saradnji sa nadležnim tijelima i organizacijama),
- i) Promocija i organizacija međunarodnih sajmova u Bosni i Hercegovini i zvanično učešće na sajmovima u inostranstvu (dogovaranje, koordinacija i organiziranje zajedničkog nastupa bosanskohercegovačke privrede na sajmovima u inostranstvu i međunarodnim sajmovima u zemlji, samostalno i u saradnji sa privrednim komorama entiteta i privrednim komorama regiona i kantona),
- j) Vođenje registra vanjskotrgovinskih organizacija u Bosni i Hercegovini na osnovu podataka koje joj obavezno dostavljaju privredne komore kantona/regiona, privredne komore entiteta i Privredna komora Brčko distrikta BiH.

Komora, u partnerskom odnosu sa nadležnim tijelima u Bosni i Hercegovini, utječe na:

- a) Razvoj i unapređenje vanjskotrgovinske politike (podsticaji izvoza, izvozni i uvozni režimi, dugoročna proizvodna saradnja, trgovina uslugama, nacionalno tretiranje, zaštitne mjere, strana ulaganja, bilateralna saradnja sa komorama drugih država, multilateralna saradnja),
- b) Razvoj i unapređenje carinske politike i tarifa (carinsko područje, granični promet, prijavljivanje robe, carinske tarife, vrste carina, carinska dokumentacija i sl.),
- c) Razvoj i unapređenje međunarodnih finansija (saradnja sa međunarodnim finansijskim institucijama, otpлата starih kredita, novi krediti, sukcesija bivše SFRJ i sl.),
- d) Koordinacija obnove i rekonstrukcije sa entitetima (planovi i programi obnove, donatorske konferencije, koordinacija obnove u oblasti privrede i infrastrukture i sl.),

e) Razvoj i unapređenje međunarodnog prometa i komunikacija (saradnja sa drugim državama, planovi obnove međudržavnog prometa, komunikacije, kontrola zračnog prometa, reguliranje međuentitetskog prometa).

Pored djelatnosti utvrđenih u st. 1. i 2. ovog člana, Komora obavlja poslove povjerene propisima nadležnih tijela Bosne i Hercegovine te pojedinačne konsalting usluge članovima Komore, organizacijama iz inostranstva i trećim licima.

Prilikom obavljanja djelatnosti utvrđenih u st. 1., 2. i 3. ovog člana, Komora uvijek osigurava promociju privrede Bosne i Hercegovine kako u zemlji tako i inostranstvu.

Poslovi iz oblasti javnih ovlaštenja

Član 8.

Zadaci iz oblasti javnih ovlaštenja u smislu člana 7. stav 1. tačka c) ovog Statuta uglavnom se odnose na:

- a) stručne i operativne poslove na izdavanju završne saglasnosti za kontingent detašmana za rad u skladu s međudržavnim sporazumima Bosne i Hercegovine i Instrukcijom Ministarstva vanjske trgovine i ekonomskih odnosa BiH,
- b) izdavanje obrazaca o porijeklu robe u okviru Generalnog sistema povlastica (GSP) sheme (FORM A), kao i izdavanje obrazaca za nepreferencijalno porijeklo robe (CERTIFICATE OF ORIGIN), u skladu sa zaključenim sporazumima nadležnih institucija u Bosni i Hercegovini,
- c) provođenje nadležnosti povjerenih od Vijeća ministara Bosne i Hercegovine ili nadležnog tijela Bosne i Hercegovine po Konvenciji o privremenom uvozu – ATA karnet i Carinskoj konvenciji o međunarodnom prijevozu robe na osnovu karneta TIR – TIR konvencije,
- d) obavljanje poslova Agencije za promociju izvoza Bosne i Hercegovine, na osnovu odluke Vijeća ministara BiH,
- e) usklađivanje i registraciju međunarodnih i međuentitetskih autobuskih linija,
- f) raspodjelu dozvola za prijevoz putnika i robe u međunarodnom cestovnom prometu,
- g) obavljanje drugih javnih poslova koji se odlukama nadležnih tijela prenesu na Komoru.

Zadaci iz oblasti stručnih ovlaštenja iz člana 7. stav 1. tačka c) uglavnom se odnose na:

- a) izdavanje i ovjeru dokumenata koji prate robu u izvozu i uvozu,
- b) izdavanje uvjerenja o bonitetu preduzeća, banaka i drugih organizacija,
- c) izdavanje uvjerenja o izvršenoj edukaciji i osposobljavanju kadrova u privredi i drugim djelatnostima,

d) stručne poslove i ovlaštenja proizašla iz članstva Komore ili njenih asocijacija u međunarodnim asocijacijama ili učešća u međunarodnim ili domaćim projektima,

e) druge stručne poslove i ovlaštenja u skladu sa odlukama Upravnog odbora Komore.

Način obavljanja poslova iz stava 1. ovog člana utvrđuju se propisima nadležnih državnih tijela i odlukama Upravnog odbora.

Postupak izdavanja, sadržaj uvjerenja, certifikata ili drugog dokumenta koji se izdaje u okviru poslova iz stava 2. ovog člana, ukoliko nije utvrđen posebnim aktom, uređuje Upravni odbor.

Komora primjenjuje javne ovlasti na osnovu člana 2. Zakona o upravi BiH.

Ministarstvo vanjske trgovine i ekonomskih odnosa Bosne i Hercegovine provodi nadzor nad obavljanjem poslova javnih ovlaštenja u Komori, u skladu sa Zakonom o upravi.

Komora će operativno-tehničke poslove iz svoje nadležnosti u vezi sa javnim i stručnim ovlaštenjima, na osnovu posebnih odluka Upravnog odbora, implementirati u saradnji sa privrednim komorama organiziranim na teritoriji BiH, vodeći računa o efikasnosti i racionalnosti, a u interesu svojih članica.

II - PRAVA I DUŽNOSTI ČLANOVA

Član 9.

Članovi Komore su ravnopravni u pravima, obavezama i odgovornostima u Komori.

Prava, obaveze i odgovornosti člana Komore su naročito:

- upravljanje poslovima i izbor tijela;
- aktivno učešće na izvršavanju poslova Komore;
- pokretanje inicijative i predlaganje mjera za donošenje propisa i mjera državnih tijela iz oblasti vanjske trgovine, carina, monetarnog sistema, međunarodnih finansija i osiguranja, te unapređenje funkcioniranja međunarodnog prometa, komunikacija i međuentitetskog prometa;
- u skladu sa svojim ekonomskim interesima, korištenje stručne pomoći i drugih usluga koje Komora i njene strukovne asocijacije pružaju i obavljaju u izvršavanju poslova;
- davanje potrebnih informacija od interesa za uspješno obavljanje utvrđenih poslova Komore;
- rješavanje i posredovanje u rješavanju sporova pred sudovima pri i u Komori;
- ostvarivanje saradnje sa tijelima i organizacijama Bosne i Hercegovine putem Komore, posebno u rješavanju svojih interesa iz oblasti koje su redovni poslovi Komore;
- uredno plaćanje članarine i drugih utvrđenih novčanih obaveza Komori;

- pridržavanje odredaba ovog Statuta i drugih akata i odluka Komore.

III - SARADNJA SA DRŽAVNIM TIJELIMA I INSTITUCIJAMA I PRIVREDNIM KOMORAMA

Član 10.

Komora, iz djelokruga poslova utvrđenih u članu 7. ovog Statuta, saraduje sa nadležnim tijelima i institucijama Bosne i Hercegovine, entiteta i Brčko distrikta BiH, a posebnu saradnju u svim svojim aktivnostima ostvaruje sa Ministarstvom vanjske trgovine i ekonomskih odnosa Bosne i Hercegovine.

Komora putem svojih tijela i tijela strukovnih asocijacija ostvaruje odgovarajući kontakt sa tijelima i institucijama iz prethodnog stava, vodi dijalog sa državnim tijelima u ime svojih članova osiguravanjem jasnih informacija u smislu provođenja zakona, mjera, strategije razvoja, objašnjavanja standarda usluga, te izmjena postojećih i donošenja novih zakona u skladu sa općim interesima svojih članova.

Član 11.

Partnerski odnos sa državnim tijelima podrazumijeva učesće Komore:

- u stručnoj saradnji na pripremi zakona i drugih propisa iz oblasti vanjskotrgovinske i carinske politike, prometa i finansija;
- u davanju mišljenja na sporazume, ugovore i druge dokumente o trgovini i investicijama koji se zaključuju sa drugim zemljama.

Član 12.

Komora će, u skladu sa djelokrugom poslova, stupati u dijalog sa nadležnim tijelima i institucijama i na zahtjev pojedinih članova kada zaključi da je to od općeg privrednog interesa.

Član 13.

Komora u svim svojim aktivnostima djeluje u saradnji i/ili dogovoru sa:

- a) Privrednom komorom Federacije Bosne i Hercegovine,

b) Privrednom komorom Republike Srpske,

c) Privrednom komorom Brčko distrikta BiH.

Komora saraduje i sa regionalnim, kantonalnim, strukovnim i specijaliziranim komorama.

U cilju postizanja međusobne koordinacije rada komora, u Komori se obrazuje Međukomorsko vijeće koje koordinira njihove aktivnosti, prati rad i utvrđuje zajedničke zadatke i oblike saradnje.

Članovi Međukomorskog vijeća su, po funkciji, predsjednici komora iz st. 1. i 2. ovog člana.

Predsjedavajući Međukomorskog vijeća je predsjednik Komore.

Član 14.

Komora saraduje i sa privrednim komorama i drugim stručnim institucijama u inostranstvu preko svojih nadležnih tijela, strukovnih ili specijaliziranih asocijacija, a na način kako međusobno odrede.

U cilju razvijanja saradnje sa inostranstvom, Komora zaključuje sporazume o saradnji sa komorama drugih zemalja, otvara mješovite komore, učlanjuje se u međunarodne komore, te učestvuje i zastupa interese privrede Bosne i Hercegovine u radu regionalnih i svjetskih komorskih asocijacija.

IV - JAVNOST RADA I OBAVJEŠTAVANJE ČLANOVA

Član 15.

Javnost rada Komore ostvaruje se održavanjem javnih sjednica tijela i drugih organizacionih oblika u Komori, izvještavanjem o njihovom radu pojedinačno ili putem glasila Komore i saradnjom sa sredstvima javnih medija.

Član 16.

Kada se pokaže interes, Komora će samostalno ili zajedno sa drugim privrednim komorama, u skladu sa aktom o međusobnoj saradnji, osigurati informiranje članova o radu učesnika međusobne saradnje.

V - TIJELA I ORGANIZACIJA KOMORE

Član 17.

Tijela Komore su:

- Skupština,
- Upravni odbor,
- Nadzorni odbor,
- predsjednik i dva potpredsjednika.

Mandat tijela Komore je četiri godine.

Izbori za tijela Komore su tajni.

U tijela Komore biraju se istaknuti privrednici i naučno-stručni radnici iz oblasti privrede.

Skupština

Član 18.

Skupština Komore je najviše tijelo upravljanja Komorom.

Skupštinu čine predstavnici članova Komore, po slijedećem kriteriju:

a) preduzeća, banke, osiguravajuća društva i druga pravna lica - članovi Komore utvrđeni u stavu 1. člana 6. ovog Statuta, biraju 70% od ukupnog broja komorskih predstavnika;

b) Privredna komora Federacije Bosne i Hercegovine, Privredna komora Republike Srpske, Privredna komora Brčko distrikta BiH, kao kolektivni članovi, privredne komore organizirane na teritorijalnom i strukovnom principu, specijalizirane i slične asocijacije, naučno-istraživačke i obrazovne institucije, udruženja građana koja u svojoj registraciji imaju privrednu djelatnost, savezi, interesne asocijacije, fondacije i zaklade i druge organizacije koje obavljaju djelatnost od značaja za privredu - članovi Komore utvrđeni u st. 1., 2. i 3. člana 6. ovog Statuta, biraju 30% komorskih zastupnika.

Skupština Komore ima 60 predstavnika, i to 38 predstavnika biranih sa područja Federacije Bosne i Hercegovine, 19 predstavnika sa područja Republike Srpske i tri predstavnika sa područja Brčko distrikta BiH, uz uvažavanje kriterija po kojima se osigurava adekvatna teritorijalna, vlasnička, strukovna, nacionalna i spolna zastupljenost.

Odlukom o raspisivanju izbora, koju donosi Skupština Komore, utvrđuju se izborne jedinice i kriteriji za izbor, kao i sva ostala pitanja u vezi izbora predstavnika.

Odluka o raspisivanju izbora donosi se najkasnije do 31. marta, a Skupština novog saziva konstituira se najkasnije do 1. juna godine u kojoj se provode redovni izbori.

Skupština novog saziva raspisuje i vrši izbor članova Upravnog odbora i njihovih zamjenika, članova Nadzornog odbora i njihovih zamjenika, te predsjednika i dva potpredsjednika Komore najkasnije do 20. juna godine u kojoj se provode izbori.

Skupština novog saziva u periodu od konstituiranja pa do 30. juna godine u kojoj se provode izbori razmatra i donosi odluke koje se isključivo odnose na izborni proces za tijela koje bira Skupština.

Član 18. a

Ako Skupština ne donese odluku u roku iz člana 18. stav 5. Statuta, predsjednik Komore u roku od sedam dana svojom odlukom raspisuje izbore i formira Komisiju za provođenje izbora za predstavnike u Skupštini.

U slučaju da predsjednik Komore ne raspiše izbore i ne formira Komisiju, to će u daljem roku od sedam dana svojom odlukom učiniti potpredsjednik Komore iz konstitutivnog naroda kome pripada naredni predsjednički mandat.

Na isti način i u istom roku postupit će i drugi potpredsjednik Komore ukoliko se ne raspišu izbori i ne formira Komisija u skladu sa prethodnim stavom ovog člana.

U pravilu, Komisiju čine članovi komisije koja je provodila izbore aktuelnog saziva Skupštine. Ukoliko je taj sastav nepotpun, nedostajuće članove Komisije predlažu članovi Upravnog odbora Komore prema pripadnosti konstitutivnom narodu nedostajućih članova.

Komisija iz svog sastava bira predsjednika i dva potpredsjednika Komisije.

Izbori se provode prema odluci na osnovu koje je izabran aktuelni saziv Skupštine, pri čemu se naročito vodi računa da se kroz strukturu Skupštine osiguraju teritorijalna i granske zastupljenosti privrede, te entitetska, nacionalna i spolna zastupljenost u Skupštini. Predstavnicima se biraju tako da predstavljaju privredno-pravne subjekte registrirane za vanjskotrgovinsku djelatnost koji redovno izmiruju svoje obaveze prema Komori.

U skladu sa odlukom iz prethodnog stava, Komisija objavljuje javni poziv za predlaganje i kandidiranje predstavnika. Javni poziv se objavljuje u najmanje tri dnevna lista i ostaje otvoren najmanje 15 dana od dana objavljivanja.

Odluke Komisije ne mogu biti u suprotnosti sa zakonom i ovim Statutom.

Sve odluke iz svoje nadležnosti Komisija, u pravilu, donosi konsenzusom. Ukoliko se ne postigne konsenzus, smatra se donesenom ona odluka za koju su glasala po dva člana Komisije iz svakog konstitutivnog naroda.

Član 19.

Mandat zastupnika u Skupštini prestaje prije isteka vremena na koje je izabran:

- opozivom od strane privrednog društva koje ga je predložilo,
- podnošenjem ostavke ili

- u slučaju smrti.

Mandat predstavnika u Skupštini prestaje i zbog neprisustvovanja na dvije sjednice Skupštine uzastopno.

Upraznjeno predstavničko mjesto Skupština popunjava predstavnikom s liste prijavljenih kandidata pristiglih prijavi po javnom pozivu za izbor komorskih predstavnika, iz iste izborne baze iz koje je izabran predstavnik kome je prestao mandat, a postupak zamjene provodi Verifikaciona komisija.

Član 20.

Skupština Komore ima predsjednika i dva potpredsjednika koji se biraju iz reda zastupnika na prvoj sjednici, po kriteriju zastupljenosti pripadnika konstitutivnih naroda.

Predsjednik i dva potpredsjednika mijenjaju se na funkciji svakih šesnaest mjeseci, a prema usvojenom rasporedu.

Skupština Komore radi u sjednicama koje se održavaju po potrebi, a najmanje jedanput godišnje. Sjednicom rukovodi predsjednik Skupštine. Na sjednice se obavezno pozivaju i predstavnici odgovarajućih tijela Bosne i Hercegovine radi učešća u radu.

Sjednicama Skupštine obavezno prisustvuju predsjednik, potpredsjednici i generalni sekretar Komore s pravom da učestvuju u debati, da podnose izvještaje o materiji iz dnevnog reda, te da na zahtjev predstavnika daju određena obrazloženja.

Način rada Skupštine bliže se uređuje Poslovníkom o radu.

Član 21.

Skupština Komore:

- donosi Statut;
- donosi smjernice za dugoročni plan aktivnosti Komore;
- donosi godišnji program rada;
- usvaja godišnji finansijski plan i završni račun Komore;
- usvaja izvještaj o radu Komore;
- donosi odluku o visini članarine i kotizacije za članove;
- donosi izbornu odluku za izbor tijela Komore;
- bira i razrješava svog predsjednika i dva potpredsjednika;

- bira i razrješava članove Upravnog odbora Komore;
- bira i razrješava predsjednika i članove Nadzornog odbora Komore;
- bira i razrješava predsjednika i dva potpredsjednika Komore;
- razmatra izvještaje tijela koje bira i imenuje;
- donosi i druge odluke, zaključke i preporuke iz svoje nadležnosti.

Radi obavljanja određenih poslova iz svog djelokruga, Skupština može obrazovati stalna i povremena radna tijela. Odlukom o obrazovanju utvrđuje se broj članova, izbor, djelokrug poslova i druga pitanja bitna za njihov rad.

Član 22.

Skupština može punovažno odlučivati ako sjednici prisustvuju 2/3 od ukupnog broja svih predstavnika, s tim da su proporcionalno zastupljeni predstavnici iz reda sva tri konstitutivna naroda.

Skupština Komore Statut donosi većinom od 4/5 svih predstavnika. U svim drugim slučajevima, smatra se usvojenom odluka za koju je glasala natpolovična većina prisutnih, s tim da za odluku glasa najmanje po 1/3 ukupnog broja predstavnika iz svakog od konstitutivnih naroda.

Način i postupak odlučivanja i rada Skupštine uređuje se Poslovníkom o njenom radu.

Član 23.

Skupština Komore bira Komisiju za izbore i imenovanja od devet članova, kao stalno tijelo Skupštine Komore, koja pokreće inicijativu i predlaže kandidate za obavljanje funkcija koje bira, odnosno imenuje Skupština Komore, kao i za zamjenu predstavnika u skladu sa članom 19. stav 3. Statuta.

Način rada Komisije za izbore i imenovanja bliže se određuje njenim Poslovníkom o radu.

Upravni odbor

Član 24.

Upravni odbor Komore je tijelo upravljanja Komore i izvršno tijelo Skupštine Komore.

Upravni odbor ima devet članova od kojih se šest bira iz reda uspješnih privrednika, i to po dva iz reda svakog od konstitutivnih naroda, odnosno tri sa prostora Federacije Bosne i Hercegovine, dva sa prostora Republike Srpske i jedan sa prostora Brčko distrikta BiH, dok su tri člana po funkciji, i to predsjednik i dva potpredsjednika Komore.

Upravni odbor ima predsjednika i dva zamjenika predsjednika koje bira iz reda svojih članova i koji se mijenjaju na funkciji po utvrđenom rasporedu.

Generalni sekretar Komore učestvuje u radu Upravnog odbora na isti način kako je utvrđeno i za Skupštinu Komore.

Član 25.

Upravni Odbor Komore vrši naročito slijedeće poslove:

- priprema i predlaže statut, odluke, programe, planove i druga akta koje donosi Skupština Komore;
- priprema godišnja akta Komore;
- utvrđuje stavove i prijedloge za vođenje partnerskog dijaloga na donošenju sistemskih zakona iz svoje oblasti rada;
- utvrđuje prijedloge i mjere na ujednačavanju ekonomskog položaja članova Komore;
- po potrebi razmatra određena pitanja i probleme koji su od općeg interesa za članove Komore;
- donosi odluku o zaključivanju sporazuma i ugovora o bilateralnoj i multilateralnoj saradnji sa nacionalnim komorama drugih država;
- donosi odluku o učlanjenju u komorske i druge međunarodne asocijacije a prvenstveno u cilju nastupa naše privrede na inostranom tržištu;
- donosi odluku, pravila i kriterije za organiziranje predstavničke mreže za zajedničko predstavljanje privrede Bosne i Hercegovine u inostranstvu;
- donosi uzanse, pravila i druga akta;
- donosi odluku i druga akta o načinu obavljanja javnih ovlaštenja;
- razvija saradnju sa odgovarajućim tijelima privrednih komora entiteta i Brčko Distrikta BiH;
- obrazuje svoja stalna i povremena tijela;
- imenuje i razrješava generalnog sekretara i zamjenike generalnog sekretara Komore;
- obavlja i druge poslove utvrđene posebnim aktima.

Član 26.

Mandat članova Upravnog odbora prestaje i prije isteka mandata:

- opozivom od strane Skupštine,

- neopozivom ostavkom ili
- u slučaju smrti.

Član 27.

Upravni odbor radi u sjednicama koje se održavaju prema potrebi.

Upravni odbor može punovažno raditi ako sjednici prisustvuje najmanje sedam članova.

Sjednicom Upravnog odbora rukovodi predsjednik a u njegovoj odsutnosti, po ovlaštenju predsjednika Upravnog odbora, jedan od zamjenika predsjednika Upravnog odbora.

Član 28.

Upravni odbor donosi odluke većinom glasova ukupnog broja članova, s tim da se odluka smatra donesenom ako je za nju glasao najmanje po jedan predstavnik konstitutivnih naroda, koji nije član Upravnog odbora po funkciji.

Način rada Upravnog odbora detaljnije se regulira Poslovníkom o njegovom radu.

Nadzorni odbor

Član 29.

Nadzorni odbor Komore vrši kontrolu zakonitosti rada Komore, a posebno njenog materijalno-finansijskog poslovanja.

Nadzorni odbor ima predsjednika i dva člana koji se biraju iz reda istaknutih ekonomskih i pravnih stručnjaka uz zastupljenost konstitutivnih naroda.

Članovi Nadzornog odbora ne mogu biti iz reda zastupnika Skupštine i članova Upravnog odbora Komore.

Mandat člana Nadzornog odbora prestaje analogno kao i člana Upravnog odbora.

Član 30.

Nadzorni odbor Komore dužan je da najmanje jedanput godišnje izvrši kontrolu materijalno-finansijskog poslovanja.

Nadzorni odbor obavezno razmatra godišnji izvještaj o radu Komore i završni račun i svoj izvještaj dostavlja Skupštini Komore.

Po isteku poslovne/kalendarske godine Skupština, odnosno Upravni odbor Komore neće razmatrati niti odobriti završni obračun bez posebnog izvještaja Nadzornog odbora.

Rad Nadzornog odbora bliže se uređuje Poslovnikom o radu.

Radna i druga tijela

Član 31.

U okviru Komore mogu se, po funkcionalnom principu, formirati odbori, vijeća, komisije i druga tijela, s ciljem ekspertne obrade, razmatranja i utvrđivanja stavova, posebno u vezi sistema i mehanizma vanjske trgovine, carina, slobodnih zona, promocije, sajmovi i slično.

Skupština, odnosno Upravni odbor donose odluku o formiranju tijela iz prethodnog stava.

Odlukom o obrazovanju tijela iz st. 1. i 2. ovog člana određuje se broj članova, sastav, mandat i djelokrug poslova.

Član 32.

Odbori, vijeća, komisije i druga tijela, svaki iz svoje nadležnosti, utvrđuje odgovarajuće programe izvozno-uvozne politike, promocije i nastupa bosanskohercegovačke privrede u inostranstvu, standarde i kalendar međunarodnih sajmovi u zemlji i nastupe na sajmovima u inostranstvu, primjedbe, prijedloge i mišljenja na pozitivne zakonske propise iz svoje oblasti i dostavljaju ih, u vidu prijedloga, Upravnom odboru Komore.

Organizacija rada i procedura pripremanja, razmatranja, utvrđivanja rješenja, prijedloga i stavova iz svoje nadležnosti te druga pitanja bitna za rad reguliraju se Poslovnikom o radu.

VI - PREDsjedNIK, POTPREDsjedNICI I GENERALNI SEKRETAR KOMORE

Član 33.

Komora ima predsjednika i dva potpredsjednika koje bira Skupština, po principu zastupljenosti konstitutivnih naroda, sa izmjenljivošću mandata na funkciji predsjednika svakih šesnaest mjeseci, na

način utvrđen odlukom o izboru.

Skupština Komore može odlučiti, prilikom donošenja odluke o imenovanju, da predsjednik i potpredsjednici Komore ovu funkciju obavljaju volonterski.

Član 34.

Predsjednik Komore predstavlja i zastupa Komoru u zemlji i inostranstvu i rukovodi njenim radom.

Predsjednik predstavlja interese članova Komore u inostranstvu, uspostavlja i unapređuje bilateralne odnose sa privrednim asocijacijama drugih zemalja, međunarodnim institucijama i organizacijama, aktivno učestvuje u radu međunarodnih privrednih asocijacija u kojima je Komora član ili posmatrač.

Predsjednik uspostavlja, usmjerava, unapređuje i vrši koordinaciju partnerskog odnosa Komore sa izvršnom i zakonodavnom vlašću Bosne i Hercegovine s ciljem unapređenja poslovnog ambijenta, razvoja i unapređenja vanjskotrgovinske i carinske politike, carinskih tarifa, međunarodnih finansija, međunarodnog prometa i komunikacija, te aktivno učestvuje u radu interesnih i strukovnih asocijacija organiziranih u okviru Komore.

Predsjednik priprema nacrt programa rada Komore i odgovoran je za njegovo izvršenje, izvršava odluke i zaključke tijela Komore koje mu se stave u nadležnost.

Sve poslove iz svoje nadležnosti predsjednik obavlja u koordinaciji sa potpredsjednicima Komore.

Predsjednik Komore za značajne odluke i poslove iz svoje nadležnosti konsultira potpredsjednike i generalnog sekretara Komore.

Član 35.

Predsjednik i potpredsjednici Komore biraju se iz reda uspješnih privrednika sa odgovarajućom stručnom spremom, znanjem najmanje jednog svjetskog jezika, odgovarajućim iskustvom i znanjima za poslove koji se obavljaju u Komori.

Na osnovu odluke o imenovanju, Upravni odbor Komore, odnosno generalni sekretar Komore zaključuje sa predsjednikom i potpredsjednicima poseban ugovor, kojim se utvrđuju međusobna prava i obaveze.

Član 36.

Komora ima generalnog sekretara i dva zamjenika generalnog sekretara koje imenuje Upravni odbor, po principu zastupljenosti konstitutivnih naroda sa izmjenljivošću mandata na funkciji generalnog sekretara svakih šesnaest /16/ mjeseci.

Generalni sekretar, u dogovoru i koordinaciji sa dva zamjenika, organizira proces rada, rukovodi radom

i poslovanjem stručnih službi Komore, stara se o finansiranju, upravlja finansijskim sredstvima i odgovara za zakonitost rada.

Za generalnog sekretara i zamjenika generalnog sekretara može biti imenovano lice pravnog, ekonomskog ili tehničkog smjera, stručne reference u rukovođenju i organiziranju poslova.

Generalni sekretar, predsjednik Komore i predsjednik Upravnog odbora moraju biti iz reda tri konstitutivna naroda.

VII - STRUKOVNO I DRUGI OBLICI POVEZIVANJA ČLANOVA KOMORE

Član 37.

Članovi Komore mogu se interesno, odnosno strukovno povezivati i organizirati u okviru Komore, dobrovoljno, na osnovu odluka i akata o osnivanju asocijacija, sa i bez svojstva pravnog lica.

U okviru Komore mogu se organizirati asocijacije poslodavaca, odnosno menadžera, na dobrovoljnoj osnovi, radi zastupanja svojih interesa prema tijelima i sindikatu Bosne i Hercegovine, u partnerskom odnosu iz oblasti rada, zapošljavanja i socijalne politike.

Član 38.

Strukovne i specijalizirane asocijacije iz člana 37. ovog Statuta, obrazuju se na osnovu kriterija i postupka za obrazovanje strukovnih i specijaliziranih asocijacija u Komori, koje donosi Upravni odbor Komore.

Upravni odbor cijeni, u svakom konkretnom slučaju, cjelishodnost i interes Komore kao cjeline za osnivanjem asocijacije u okviru Komore.

Član 39.

Strukovne i specijalizirane asocijacije aktom o osnivanju utvrđuju način obavljanja svojih djelatnosti i zadataka, tijela, kao i druga pitanja bitna za rad asocijacije.

Akt o osnivanju strukovne i specijalizirane asocijacije u Komori ne smije biti u suprotnosti sa Statutom i drugim aktima Komore.

VIII - ARBITRAŽA I SUD ČASTI

Član 40.

Pri Komori se organizira Arbitražni sud u čijoj su nadležnosti sporovi domaćih i stranih privrednih subjekata iz njihovih međusobnih odnosa o pravima i obavezama kojima mogu slobodno raspolagati, ako zakonom ili drugim aktom u skladu sa zakonom nije utvrđeno da određene vrste sporova rješavaju isključivo redovni sudovi.

Odluke Arbitražnog suda su konačne i imaju snagu presude redovnog suda.

Organizacija, način rada, izbor sudija, postupak i druga pitanja bitna za rad Arbitražnog suda uređuju se pravilnikom koji donosi Upravni odbor Komore.

Član 41.

U Komori se obrazuje Sud časti koji odlučuje o povredama dobrih poslovnih običaja i akata Komore, kada su stranke privredni subjekti iz dva entiteta.

Organizacija, način rada, liste sudija, postupak i druga pitanja uređuju se posebnim pravilnikom koji donosi Upravni odbor Komore.

IX - UPRAVA STRUČNIH POSLOVA

Član 42.

Stručne, finansijske, administrativno-tehničke i druge poslove za Komoru obavlja Uprava stručnih poslova Komore.

Uprava stručnih poslova Komore organizira se u centre, sektore, urede, odjele i druge organizacione oblike zavisno od potreba i mogućnosti usklađivanja sa interesima članova te tekućim i dugoročnim zadacima Komore.

Unutrašnja organizacija, djelokrug rada, veze i proces rada, koordinacija i druga pitanja rada Uprave stručnih poslova Komore utvrđuju se posebnim aktom koji donosi Upravni odbor Komore.

Shemu unutrašnje organizacije sa sistematizacijom radnih mjesta u Upravi stručnih poslova Komore na osnovu akta iz prethodnog stava, generalni sekretar Komore, uz saglasnost dva zamjenika generalnog sekretara, predlaže Upravnom odboru na usvajanje.

Komora može ugovorom povjeriti dio stručnih i drugih poslova odgovarajućoj specijaliziranoj organizaciji (agenciji, centru ili institutu) čiji je osnivač ili suosnivač.

U pravilu, struktura zaposlenika u Upravi stručnih poslova Komore treba odgovarati participaciji konstitutivnih i drugih naroda u Bosni i Hercegovini.

Član 43.

Komora može, za obavljanje određenih poslova, organizirati preduzeća, agencije, institute i druga pravna lica, u skladu sa zakonom, koja se registriraju kod nadležnog suda.

Odluku o organiziranju samostalne organizacije iz prethodnog stava donosi Upravni odbor Komore u skladu sa zakonom.

Član 44.

U cilju stručno-ekspertnog rada u Komori se ustanovljava lista eksperata iz različitih naučno-stručnih i poslovnih disciplina. Eksperti za ustanovljavanje liste angažiraju se po potrebi na programima i rješavanju pojedinih stručnih problema za potrebe Komore ili njenih članova.

Kriterije za listu eksperata utvrđuje Upravni odbor.

Eksperti se mogu angažirati pojedinačno ili kao komisija eksperata, zavisno od zadatka koji treba obaviti.

X - SREDSTVA ZA RAD KOMORE BiH

Član 45.

Sredstva za rad Komore osiguravaju se iz članarine i kotizacije koju plaćaju njeni članovi, prihoda ostvarenih obavljanjem poslova javnih i stručnih ovlaštenja, naknade za konsalting i druge stručne usluge te sponzorstva i donacija.

Članarinu Komori plaćaju pojedinačni članovi, utvrđeni u stavu 1. člana 6. ovog Statuta, a kotizaciju njeni kolektivni članovi.

Naknade za usluge utvrđuju se za pojedinačne stručne i druge poslove koje Komora obavi za članove i druga pravna i fizička lica.

Posebno utvrđeni projekti i programi finansiraju se iz izvora koji se formiraju za tu namjenu na osnovu ugovora zainteresiranih subjekata.

Komora može ostvariti sredstva iz Budžeta institucija BiH za obavljanje agencijskih poslova promocije izvoza roba i usluga iz Bosne i Hercegovine, kao i za druge poslove koji joj se dodijele.

Član 46.

Skupština Komore utvrđuje osnovicu i visinu članarine i kotizacije, te način i rokove njene uplate.

Mjesečna članarina za pojedinačne članove ne može biti viša od trostrukog iznosa prosječne neto plaće u Bosni i Hercegovini isplaćene u prethodnoj kalendarskoj godini. Prosječna neto plaća u BiH utvrđuje se na osnovu zvaničnih podataka Agencije za statistiku Bosne i Hercegovine.

Upravni odbor Komore utvrđuje tarifu za konsalting, privredne i druge servisne usluge, do iznosa određenog zakonom.

Članarina i kotizacija Komori utvrđuje se godišnje, prilikom usvajanja finansijskog plana/budžeta Komore za narednu godinu.

Član 47.

Upravni odbor podnosi svake godine Skupštini prijedlog finansijskog plana/budžeta za narednu godinu, kao i godišnji izvještaj i završni račun za prethodnu godinu, sa obrazloženjem. Godišnji izvještaj i završni račun za prethodnu godinu prethodno se ispituje od strane Nadzornog odbora.

Nacrt finansijskog plana/budžeta, godišnji izvještaj i sva prateća dokumenta pohranjuju se u računovodstvu Komore i na raspolaganju su svakom članu Komore. Informacija o tome objavljuje se u "Službenom glasniku BiH" i u najmanje tri dnevne novine koje pokrivaju područje Bosne i Hercegovine, najmanje četrnaest dana prije razmatranja na Skupštini.

Rasprava i glasanje o Nacrtu finansijskog plana/budžeta na Skupštini je javno.

Izveštaj o izvršenju budžeta Komore obavezno se dostavlja Vijeću ministara Bosne i Hercegovine radi upoznavanja, i to najkasnije do 31. marta za prethodnu fiskalnu godinu.

XI - PRIJELAZNE I ZAVRŠNE ODREDBE

Član 48.

Imovina Privredne komore Bosne i Hercegovine, saglasno članu 27. Zakona o Vanjskotrgovinskoj komori Bosne i Hercegovine, postat će imovina Vanjskotrgovinske komore Bosne i Hercegovine, kao javno-pravne asocijacije privrednih subjekata i privrednih asocijacija - članova sa teritorije Bosne i Hercegovine.

Primopredaja imovine, prava i obaveza između Privredne komore Bosne i Hercegovine i Vanjskotrgovinske komore Bosne i Hercegovine izvršit će se u roku od 90 dana od dana konstituiranja Skupštine Komore.

Korištenje nepokretne imovine uredit će se ugovorima Komore i drugih komora i strukovnih asocijacija.

Ugovore će odobravati nadležno tijelo Komore.

Do donošenja novih, ostaju na snazi opći akti koje su donijela tijela Privredne komore Bosne i Hercegovine koji nisu u suprotnosti sa ovim Statutom.

Član 49.

Do izbora tijela Komore nastavljaju sa radom postojeća tijela, funkcioneri i ostali radnici Privredne komore Bosne i Hercegovine koji su dužni, u roku iz prethodnog člana, obaviti sve pripremne radnje i donijeti odgovarajuće odluke i akte za primopredaju imovine, prava i obaveza Privredne komore Bosne i Hercegovine na Vanjskotrgovinsku komoru Bosne i Hercegovine.

Član 50.

Do donošenja novih općih akata radnici Uprave stručnih poslova Privredne komore Bosne i Hercegovine nastavljaju sa radom po odredbama postojećih općih akata.

Raspored radnika na radna mjesta utvrđena novim aktom o sistematizaciji izvršit će se na način i po postupku utvrđenim tim aktom.

Član 51.

Prečišćen tekst Statuta objavit će se u "Službenom glasniku BiH".

Broj 01-1-809-4-1/14
8. maja 2014. godine

Predsjednik Skupštine
Ruža Sopta, s. r.